

In omnibus speciminibus hoc anno cultis *Folia* speciosissimæ plantæ inferiora simplicia; superiora fere omnia ternata; foliis lateralibus multo minoribus terminali, oppositis, oblique cuneiformibus. Rarius variat foliis nonnullis, ternatis inmixtis, foliolo laterali solitario. Differentia specifica melius itaque audiret: *foliis simplicibus ternatisque* &c.

4. VOIGTIA.

Receptaculum subvillosum *Calyx communis* æqualis 5 - ad 7 - phyllus. *Calyculi proprii* marginales, plures, uniflori. *Flosculi* ligulati; *centrales* ecalyculati. *Semina radii* nuda; *centralia* pappo plumoso coronata.

VOIGTIA tomentosa.

Radix ramosa, sublignosa, annua.

Caulis erectus, a basi ramosus, divaricatus, pedalis, teres, durus, bruneus, tomentosus. *Rami* alterni, patentes.

Folia alterna, lanceolata, sessilia, amplexicaulia, remota, integra, subundulata, recurva, tomentosa, incana.

Pedunculi axillares & terminalis, solitarii, foliis duplo fere longiores, nudi, erecti, maxime tomentosi, uniflori.

Bractea sub flore solitaria, lanceolata, vix calyce longior, maxime tomentosa.

Calyx tomentosus, ante florescentiam contractus, globosus, post florescentiam latus; *communis* quinque ad septem phyllus; *foliis* æqualibus, lanceolatis, acuminatis, canaliculatis, extus convexis.

Calyculi proprii monophylli, plures, numerosi, uniflori: *radii* magnitudine & figura exacte similes calyci communi; *serierum sequentium* lanceolato-lineares, sensim minores, extus pubescentes. In centro calyculi nulli.



Corolla composita, imbricata, magnitudine fere *Leont. Taraxaci*, flava, subtus purpurascens, uniformis: *Corollulis* pluribus, omnibus hermaphroditis; *centralibus* calyculo destitutis.

Propria monopetala, ligulata, apice truncata, quinquentata, infra medium tubulosa; *tubo* filiformi.

Stam. Filamenta quinque, capillaria: *Antheræ* in tubum cylindraceum vix linea longiorem coalitæ.

Pistillum. Germen exiguum, subovatum, truncatum; *Stylus* filiformis, staminibus longior. *Stigmata* duo, revoluta.

Semina parva, brunea, cylindracea, truncata, lineæ quadrantem longa, sulcata: *radii* calyculi proprii basi immersa, pappo destituta; *serierum sequentium & centralia* *ccalyculata* pappo longo, rigido, plumoso, sessili, deciduo coronata.

Receptaculum planum, subvillosum.

Observ. I. Totius plantæ tomento immixti sunt pili exstantes, recti, capitati.

Obs. II. Nullum genus in Systemate Linneano mihi obviam venit, cui hanc plantam commode adscribere potuissem, non absque jure proprium itaque genus constituere judicavi, cui nomen amici æstumatissimi. Viri Illustris *de Voigt*, præfecti juridici in præfectura *Boheloh* principatus Calenbergensis imposui, qui per quindecim & quod excurrit annos, observationibus botanicis, novis rarisque plantis me benignissime locupletavit.

Obs. III. Ob flosculos plures calyculo proprio præditos planta ad Syngenesiam Polygamiam Segregatam quodammodo referri posset, at cum flosculi omnes ligulati & centrales calyculo proprio destituti sint, potiori jure ad *Syngenesiam Polygamiam Æqualem* referendam esse judico.

Obs. IV. Semina hujus plantæ inter Passulos majores legi, quæ hoc anno terræ steriliori horti mei commisi. Horis antemeridianis efflorescit.

5. GNAPHALIUM ITALICUM fruticosum, tomentosum, foliis linearibus margine revolutis, corymbo composito fastigiato.

G. foliis linearibus, caule fruticoso ramoso, floribus corymbosis cylindricis. Zinn. Goett. p. 401.

Ellechrysum foliis oblongis Stœchadi citrinæ similis. C. Bauh. pin. p. 264.

Filago foliis tenuissimis, floribus umbellatis cylindricis. Hall. Goett. p. 377.

Helichrysum. Cam. Epit. p. 787.

Stœchas citrina tenuifolia altera sive italica. Joh. Bauh. hist. 3. Lib. 26. p. 155. *Fig. cum descriptione bona.*

Caulis bi- seu tripedalis, erectus, fruticosus, tomentosus, inferne ramosus. *Rami* alterni; *floriferi* simplices, fere pedales.

Folia alterna, tomentosa, linearia, margine revoluta & ita quasi filiformia, integra, obtusa; in ramis junioribus approximata.

Corymbus terminalis, fastigiatus, densus, compositus ramis dichotomis, filiformibus; *lateralibus* recurvis.

Calyces subcylindracei, sulphurei, nitidi, imbricati: squamis inferioribus brevioribus, ovatis, obtusis; *interioribus* lanceolatis, radium mentientibus.

Corollula, *Pappus* & *receptaculum* ut in congeneribus.

Obs. Sub nomine *Gnaphalii fordidi* per plures annos in horto coluerunt Ill. de Voigt & pater jamjam defunctus. An forsitan varietas *Gnaphalii Stœchadis*?